



01.10.2022

UKA2022/116

**Uunnga siunnersuut: Radiukkut tv-kkullu aallakaatitsisarneq pillugu Inatsisartut Inatsisaata allanngortinnissaa pillugu Inatsisartut inatsisissaattut siunnersuut**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siunnersuuteqartup Ilinniartitaanermut, Kultureqarnermut, Timersornermut Ilageeqarnermullu Naalakkersuisoq oqaatigisaanut Radiukkut tv-kkullu aallakaatitsisarneq pillugu Inatsisartut Inatsisaata allanngortinnissaa pillugu Inatsisartut inatsisissaattut siunnersuummut Siumuminngaanniit imaattumik oqaaseqassaagut.

Siumuminngaanniit isumaqarpugut kalaallit nunatsinni sineriak tamarmiusoq tusagassiuutinik suliaqarfigineqartoq pitsaasumik inissisimassasoq, innuttaasunillu naammaginatut pitsaassuteqarluni inissisimajuartuussasoq. Pingaartipparput innuttaasut pisariaqartitaminnik tusagassiuutinik atuisinnaanerat isummersinnaanertik kiffaanngissuseqarfigalugu saaffigisinnaasariaqaraat.

Siumup pingaartippaa tusagassiortut kiffaanngissusertik atorluarlugu tusagassiornermik ingerlatsisussaananerat, taannalu soorunami innarlerneqassanngilluinnartoq.

Naalakkersuisup siunnersuutimini eqqaavaa 2014-imi siunnersuutigineqartumi tusagassiorfimmi sinaakkutini atuisut siunnersuisooqatigiivinnik peqalertussaasoq. Piffiillu ingerlanerani paasinarsisimalluni siunnersuut taamatut ittoq ingerlanneqarsinnaasimangitsoq. Taamaammat siunnersuutaanikuusimasoq taanna atorineqarsinnaanngimmat periutsimik allamik aqqutissarsiuunneqartariaqartoq Siumup paasivaa, tusagassiortut ingerlanerat pitsaanermik alloriaqqiffissaqarnissaa siunertaralugu. Taamaammat Naalakkersuisup periutsinik allamik inatsimmi aalajangersaasoqarnissaa alloriaqqiffissatut isigalugu nutarsaaffigineqartariaqalersoq oqariartuutigimmagu, Siumut isumaqataavoq.

--

KNR aqqutigalugu ussasaaruteqartarnermut tunngatillugu pineqartoq aggustusip 16-iani 2021 aallartippoq. Ilaatigut Sermitsiaq allappoq, politikikkut oqariartuutigineqartut KNR-ikkut aallakaatinneqarsinnaanngortut<sup>1</sup>.

Taamani Siumut qisuariaateqarsimavoq allalluni, killilersorneqarani oqaaseqarsinnaaneq pingaarutilerujussuusoq, aamma taamaattoq tamanut sullissisussaataasumik inuiaqatigiittut tusagassiorfiuteqarneq. Kikkut tamarmik KNR aqqutigalugu oqariartuutsinik politikimut tunngasunik oqariartuuteqarsinnaanngornerat Siumup apeqquersimavaa, tassami akiliuteqarsimagunik naammassamat<sup>2</sup>.

<sup>1</sup> <https://sermitsiaq.ag/kl/inatsimmik-allanngineqpolitikkikkut-oqariartuutigineqartut-knr-kkut-aallakaatinneqarsinnaanngorput>

<sup>2</sup> <https://siumut.gl/innuttaasut-oqartussaaqataananerat-tunngavigalugu-ingerlatsineq-innarlerneqarsinnaavoq/>



Pineqartoq pingaarutilinnik marlunnik aporfissartaqartoq Siumup tusagassiorfiit aqutugalugit erseqqissarpaa.

**Siullermik**, videup politikimik imaqarnera pissutigalugu taamani Naalakkersuisut pisussaasorisimagunik KNR-imut peersitseqqusillutik inassuteqarsinnaallutik, tunngaviumik isummerfissaq tassaasoq, Naalakkersuisut aallakaatitassanik piiasinnaasoralutik KNR-imut inassuteqarsinnaanersut.

**Aappaattut**, KNR Naalakkersuisunut aperisussaasoraluni saaffiginnissuteqarsimammat, ilumut KNR nammineq aallakaatitassiarisimanngisaminik aallakaatitsinnaanersoq apersuutigalugu. Tamatuma KNR-imi aqutsisut annertuumik qajannarsisikkai Siumut isummerpoq.

Siumumilu isumaqarpugut tamarmik sulianut toqqaanaq akulerutinnginnissamut annertuumik innarliissut.

Taamaattumik siorna aggustusimi oqariatuutigaarput, Suliassaq taanna Inatsisartut suliassamittut tigusariaqaraat. Taannalu suliassaq ullumi aallartinneqarpoq.

--

Naggataatigit KNR pineqartillugu anersaaruluutimerngit apuutilaassavakka.

**Sinerissami** ilanngutassiortoqarneq nukittorsarneqartariaqarpoq, radiukkut tv-kkullu. Sorpassuit pisut qularnanngilaq arajutsisarpagut, naak qularnanngitsumik oqartussaaqataanitsinnik ingerlatsilluta pingaarutilerujussuit pineqarsimasassagaluartut.

**Inatsisartut ataatsimiinnerat** radiukkut toqqaanaq malinnaavigineqarsinnaanera periarfissiissutigineqartariaqarpoq, taamaallaat tv-kkut malinnaasinnaaneq unitsillugu.

**Nagguqatitta** nutaarsiassatut aallakaatittagaat, KNR aqutugalugu siammarterneqartarnissaat pisariaqarpoq, tassami akitsinni qanimut malinnaanissarput pisariaqartikkippat Siumup qularutiginnigilaa.

Siusinnerusukkut Inatsisartuni immikkoortoq 115 sammigatsigu, tassalu "Tusagassiorfinnut tapiissuteqartarneq pillugu Inatsisartut inatsisaata allanngortinneqarnissaa pillugu siunnersuut" oqarpugut, Inatsisartut tusagassiuutitut tunngatillugu suleriuserput allanngortittariaqarippat. Uteqqikkusuppara oqaatigalugu, "medieforlig" atorlugu sulineq aallartittariaqarippat, taamaalilluta tusagassiorfiit atugaat pillugit ataqatigiissumik Inatsisartutut aaqqiissuteqartarnissarput aallartinniassammat.

--

Siumuminngaanniit taamatut oqaaseqarluta Naalakkersuisup siunnersuutaa ilalerlugu ataatsimiititaliamut susassaqartumut ingerlateqqinnissaa kissaatigissuarput. Sulilluarnissaannillu kissaappagut.

Mala Høy Kúko, Siumut